

Morgan 821 (2^e part.)
SVITE DV

COVRIER

DE

LA COVR,

PORTANT LES NOVVELLES

de S. Germain, depuis le 22. Mars

1649. iusques au 29.



A PARIS,

Chez DENYS LANGLOIS, au mont S. Hilaire,
à l'Enseigne du Pelican.

M. DC. XLIX.

COVER

LA COVR

COVER

COVER

COVER

COVER

COVER

COVER

COVER

COVER

COVER

COVER


COVER

COVER

COVER

COVER

COVER



SVITE DV
COVRRIER
DE LA COVR,

PORTANT LES NOUVELLES

de S. Germain, depuis le 22. Mars

1649. iusques au 29.



E n'est pas sans sujet qu'un Ancien a dit, qu'il n'y a rien de certain dans les choses humaines que leur incertitude. Je croyois avec tout le monde vous apporter à ce voyage les heurcuses & agreables nouuelles de la Paix domestique conclüe au contentement de tout le monde ; après laquelle la guerre Estrangere ne peut guere durer, ny quand elle dureroit, nous incommoder beaucoup ; mais quoy que Dieu n ait pas voulu nous accorder cette grace au iour que nous l'attendions, il y a grand sujet d'esperer qu'il exaucera bien-tost, & peut-estre dez demain, les vœux de tous les gens de bien, comme vous pouuez iuger par la disposition des affaires.

Messieurs les Députez de Roüen, dont l'absence auoit apporté quelque retardement à l'expedition des affaires dans la Conference, arriuerent à Ruël le Dimanche 21. de ce mois, au nombre de 16. sçauoir, le President de Criqueuille, & 5. autres du Parlement, dont il y en a 2. de la Grand Chambre, autant des Enquestes, & vn des Requestes, & le reste de la Chambre des Comptes, de la Cour des Aides, des Tresoriers Generaux, & du Corps de Ville.

Le lendemain ces Messieurs avec les precedens Députez du Parlement de Paris, & des Princes, se rendirent à S. Germain, où après les premiers complimens rendus, ils s'assemblerent chez Monsieur le Chancelier. Les Députez du Parlement, & de la Chambre des Comptes de Roüen eurent leur Seance au dessous de ceux du Parlement de Paris, & de la Reine: les autres en vn second rang de sieges, qu'il fallut mettre derriere les premiers, & chaque Corps

demeura séparé. Là Monsieur le Comte de Maure parla de deux choses; Premièrement d'une lettre que l'Archiduc Leopold avoit écrite à Monsieur le Prince de Conty, par laquelle il luy témoignoit qu'il n'estoit point entré en France pour y porter la guerre, & se prévaloir de nos dissensions, mais pour avancer la Paix, & que pour cet effet si on vouloit accorder une Surceance d'armes, & nommer un lieu où les Plenipotentiaires des deux Couronnes se deuroient assembler, il estoit tout prest à en faire de même: Surquoy Mr. le Prince de Conty desiroit sçavoir quelle réponse la Reine trouveroit bon qu'il fît. La 2. Proposition que ledit sieur Comte fit de la part de Monsieur le Prince de Conty, & des Generaux de Paris, fut que Monsieur le Cardinal Mazarin fût exclus du Ministère. Pour le 1. point Monsieur le Chancelier respondit qu'il y avoit sujet de s'estonner, qu'un Prince qui avoit tant de part à la gloire de la France, & les Generaux qui disoient ne travailler que pour le bien Public, voulussent faire ce tort à la reputation des armes du Roy, & à l'honneur de la Nation, que de vouloir demander ny Trefve, ny Paix aux Ennemis, tant qu'ils seroient en armes dans le Royaume, que la Reine avoit assez tesmoigné le desir qu'elle avoit de la Paix, tant par l'enuoy qu'elle avoit fait depuis peu de Monsieur de Vautorte à Bruxelles pour cet effet, que par ce qu'elle en avoit fait écrire à Munster à Monsieur Seruien, & par l'advis qu'elle avoit fait donner au Nonce du Pape, & à l'Ambassadeur de Venise, qui sont les Princes Mediateurs du Traitté, de la disposition où estoit sa Majesté de convenir d'un lieu plus proche, & y enuoyer au plus-tost des Députez, & même un du Parlement, ainsi qu'il avoit esté convenu par le Traitté de Ruël. Pour la 2. proposition, à peine ledit sieur Comte eut loisir de l'achever, Monsieur le Chancelier l'ayant interrompu, dit que les services de Monsieur le Cardinal estoient si necessaires à l'Estat, que la Reine ne le pouvoit congédier sans faire tort au Public. Que Messieurs du Parlement l'avoient ainsi reconnu, & n'avoient point insisté là dessus dans cette judicieuse Conference, qui avoit esté tenue à Ruël. Là dessus Monsieur le premier President prit la parole, & en suite Monsieur le President de Mesme, pour prier Monsieur le Chancelier de se souvenir qu'ils avoient souvent fait instance sur ce point, de la part du Parlement en la Conference de Ruël, tant par la proposition qui regardoit l'exécution des Arrests de la Compagnie, entre lesquels estoit celui du 8. Janvier, qu'autrement. Monsieur le Chancelier repliqua qu'il ne se souvenoit pas qu'ils en eussent parlé en mesmes termes, & qu'enfin c'estoit un point vuide par l'article du Traitté de Ruël, qui portoit que les Arrests rendus depuis le 6. Janvier estoient declarez nuls, & comme non avenus, aussi bien que les Declarations, Lettres de Cachet, & Arrests du Conseil: Et ainsi ne voulut point admettre cette instance, comme une proposition qui restast à vuider. En suite de cela on leur les Propositions des Députez de Rouen, qui alloient tant au soulagement du peuple de Normandie par le rabais d'un quart de la Taille, & par la reuocation de plusieurs nouveaux droits & impôts, qu'à la suppression de quantité d'Offices, particu-

culierement du nouveau Semestre du Parlement, des cruës de la Cour des Aydes, & de la Generalité d'Alençon. On renouuella la Trefve pour trois iours.

L'apresdinée Monsieur le Chancelier leut vne lettre de Monsieur Arnaut, par laquelle il donnoit aduis que l'Archiduc s'estoit retiré vers les Pays-bas, & que les troupes qui auoient passé la riuere d'Aisne, l'auoient repassée. Après cela on leut les Propositions de Monsieur de Longueuille, apportées par Monsieur de Hauctonuille, qui tendoient à supplier la Reine, de faire la Paix generale, & pouruoir au repos du peuple, & de donner quelques gratifications à Monsieur de Beuueron, & à Monsieur de Maignon.

Le mesme iour vn Enuoyé du Duc de Lorraine, qui estoit icy, & negocioit pour son Maistre depuis quelques iours, partit pour luy aller rendre compte de ce qu'il auoit fait en cette Cour, comme auoit fait le iour precedent vn Courier qu'on auoit despesché vers ce Prince pour l'obliger à bailler ses troupes à la Reine pour deux ans. On disoit en mesme temps que le Parlement de Toulouse ayant receu la Lettre Circulaire, & la remonstrance de celuy de Paris, qui leur auoient esté inconnuës auparauant, auoit approuué pour son ressort tout ce qui auoit esté fait par Messieurs du Parlement de Paris, & qu'il auoit resolu de respondre à la Lettre qui luy auoit esté enuoyée.

Mardy 23. du mois on s'assembla l'apresdinée chez Monsieur le Chancelier, qui declara sur chaque article des Propositions baillées par les Deputez de Rouen, ce qu'il croyoit que la Reine pût faire; & le Côte de Maure ayant renouuellé ses deux propositions du iour precedent, receut de pareilles responses. Il s'attendoit d'auoir la response par escrit à celle qui regardoit la lettre de l'Archiduc touchant la paix generale; mais il luy fut dit que la Reine n'auoit point donné ordre de la bailler par escrit, & qu'il se pouuoit souuenir de ce qui luy auoit esté dit le iour de deuant: de quoy il pouuoit donner aduis à Monsieur le Prince de Conty.

Le bruit courut ce iour là que le gros des troupes d'Erlach estoit arriué à Ligny en Barrois, & l'Avant-garde à Retel.

Mercredy 24. Monsieur le Telier fut au matin à Ruel, & l'on croit qu'il dit à Monsieur le premier President en particulier, que si on vouloit parler dauantage de l'éloignement de Monsieur le Cardinal, les Deputez n'auoient qu'à s'en retourner à Paris, S. M. n'en voulant pas ouyr parler: Mais cela n'estant pas bien asseuré, & Monsieur de Saintot ayant esté trouuer ces Messieurs, ils se rendirent l'apresdinée au Chasteau neuf de S. Germain dans l'appartement de S. A. R. qui n'intervint pas neanmoins dans la Conference, non plus que Monsieur le Prince, si ce n'est sur la fin, pour exhorter les Députez à terminer les affaires le plus promptement qu'il leur seroit possible. On ne fit neantmoins autre chose qu'examiner les moyens de contenter les Deputez de Rouen avec quelque temperament, sans rien resoudre.

Ce iour Monsieur le Cardinal fut saigné, & ne se laissa point voir.

Jeudy 25. iour de l'Annonciation on ne traitta dans la Conference que des affaires de Normandie, dont la plus difficile est la suppression du Semestre du Parlement, que les Deputez de ladite Compagnie demandoient absolument, & qu'on ne voulut accorder de la part du Roy, que pour la derniere creation faite de ce Regne, en sorte que les Officiers de la premiere creation faite en l'an 1641. par le feu Roy, & depuis reünis au Corps du Parlement de Normandie, subsistassent. Les Deputez disoient tousiours n'auoir point charge d'entrer en aucunes offres, iusques à ce qu'enfin sollicité par ceux de Paris, qui tesmoignerent ne se vouloir point separer de leurs interets, mais desirer aussi que la Paix se pust faire à leur contentement, ils se relascherent à offrir de recevoir dix Conseillers & vn President de ceux de la premiere creation, quoy qu'ils n'en eussent point de charge, & cela pour n'estre point cause d'une rupture si preiudiciable à l'Estat.

Ce iour on eut nouuelles que le 19. de ce mois les Habitans de Poitiers estans en armes au nombre de huit mille hommes, le Presidial, les Tresoriers de France, & le Corps de Ville s'estoient declarez pour Paris: & l'on sceut de mesme que les Espagnols auoient retiré vne partie de leurs troupes du costé de Guyse, le reste demeurant prez du Pont à Vere dans le Soissonnois, sous la conduite du Marquis de Nermonstier, qui auoit fait rompre vne arche du Pont de son costé, comme les Mareschaux d'Estrée & Du Plessis en auoient fait vne autre du costé de deça.

Vendredy 26. on sceut que sur le suiet du renouvellement de la trefue iusques à Lundy, le Parlement auoit arresté que les Deputez seroient priez d'acheuer la Conference dans ledit iour. Et dans la Conference du matin on n'auança rien, les Deputez de Normandie ne voulant point relascher dauantage, & Monsieur le Duc d'Orleans demandant au moins la conseruation de 17. Offices de Conseillers & d'un President: dont le refus obligea son Altesse Royale d'entrer dans l'Assemblée, & dire que l'on pourroit reprocher à Messieurs de Roüen d'estre cause que le Traitté de paix seroit rompu, mais qu'il esperoit de faire vn voyage en Normandie, & d'y retablir l'autorité du Roy. Apres qu'on se fut leué, les Deputez de Roüen presseés par ceux de Paris, afin qu'on ne leur imputast pas la rupture, se resolurent enfin de passer quinze Conseillers & vn President, dont son Altesse Royale tesmoignant n'estre pas contente, Monsieur le premier President qui auoit esté mandé avec Monsieur le President De-mesmes par son Altesse Royale, se fit fort de faire payer par sa Compagnie vn Office des Conseillers, afin de contenter sadite Altesse, qui dit qu'il aimoit mieux le payer luy mesme, & se contenta de l'offre desdits Deputez de Normandie, dont les Conseillers qui seront reünis, payeront chacun dix mil liures, & le President sept mil liures, pour seruir en partie à l'indemnité des supprimez, avec leurs gages de quelques années.

L'apresdinée il fut parlé des autres affaires de Normandie, & l'on accorda la suppression entr'autres choses de 17. Offices de la Cour des Aides. En suite

de cela on traitta des intereſts des Princes, & Generaux de Paris, mais ce ne fut qu'en termes generaux, que la Reine ſe reſeruoit de faire des graces, & ſans rien bailler par eſcrit.

Samedy 27. on eut nouuelles de ce qui ſ'eſtoit paſſé au païs du Maine, & des forces conſiderables que le Marquis de la Boulaye y auoit pour le Parlement, avec leſquelles il eſtoit en marche vers Angers : De ſorte qu'on parla d'enuoyer quelques troupes de ce coſté-là ſous la conduite du Marquis de Ierzé, comme auſſi d'enuoyer Monsieur le Grand-Maiſtre de l'Artillerie vers le Poictou.

Dans la Conference on ne parla bien precisément des intereſts de Meſſieurs les Generaux de la part de la Reine, comme les Deputez du Parlement ſ'y attendoient, mais on promit d'enuoyer au ſoir la reſponſe à leurs Propositions. Quant aux articles du Traitté de Ruel, ſur leſquels le Parlement auoit ordonné des Remonſtrances, on fit eſperer aux Deputez 1. que la Reine diſpenſeroit le Parlement de venir tenir le Lit de Juſtice à S. Germain, 2. que S. M. ſe contenteroit de la parole des Deputez concernant la ceſſation des Aſſemblées pour cette année, ſans exiger qu'on en fiſt vn article de la Declaration qui ſe doit faire pour la paix, 3. Que les affaires du Roy ne pouuant ſubſiſter ſans les preſts ou auances accordées pour deux ans au denier 12. en l'eſtat où ſont les choſes, S. M. trouueroit bon qu'on les reglaſt à 12. millions par an, & qu'on ne forceroit perſonne à en faire, 4. Que S. M. pourroit donner les prouiſions du Gouvernement de la Baſtille à Monsieur de Brouſſel.

Mais comme les Deputez furent partis dans l'opinion de reuenir le lendemain conclure, & ſigner le Traitté au contentement de tout le monde, on apprit que le Parlement auoit arreſté le meſme iour que ſes Deputez ſe ioindroient avec ceux des Generaux pour faire coniointement vne nouuelle inſtance pour l'éloignement de Monsieur le Cardinal, ce qui fit qu'on douta de la paix plus qu'auparauant.

Dimanche 28. de Mars iour des Rameaux, Monsieur le Telier, & Monsieur de Sainctot furent à Ruel, & parlerent aux Deputez : on croit que le premier porta les reſponſes aux Propositions de Monsieur le Prince de Conty, & des Generaux de Paris, & representa le danger qu'il y auoit de tout gaſter ſi on parloit de Monsieur le Cardinal; & l'on eſtime que les Deputez firent deſſein de vuidier auparauant tous les autres Poincts. Tant y a qu'on ſçeut le ſoir qu'ils deuoient venir le lendemain matin. Dieu vueille que ce ſoit pour conclure vne bonne paix.

Lundy 29. La Paix a eſté arreſtée le matin à midy, les Deputez eſtans demeurez d'accord de tous les Articles de part & d'autre, dont tout le monde a ſuiet d'eſtre ſatisfait; meſme Meſſieurs les Generaux de l'Armée de Paris. Meſſieurs les Deputez du Parlement doiuent demain aller à Paris porter la Declaration qui leur ſera enuoyée à Ruel, compoſée deſdits Articles, afin de la faire publier au pluſtoſt.

FIN.

